



## Le temps du repos

En Polynésie, le mois de Juillet est celui à la fois du "Heiva" (fête) et des vacances pour la majorité des gens. Il n'y a pas si longtemps, le "Tiurai", littéralement le Juillet, était une grande fête populaire au cours de laquelle les habitants des districts et des îles éloignées venaient en grand nombre à Tahiti, pour vanter la beauté et la richesse de leurs terres ancestrales. Aujourd'hui, on parle plus de Heiva que de Tiurai. Il ne reste plus du Tiurai que le vernis, que les prestations qui sont plus valorisées que l'esprit communautaire du groupe lié au district d'origine. Si on laisse dévier les choses, cela fera disparaître à jamais l'esprit qui a fait la réputation inégalable du Tiurai. Est-ce cela que nous voulons? Heureusement que nous sommes dans un temps de repos. Nous pouvons prendre notre temps pour méditer tranquillement sur ce sujet.

Soyons animés du désir de redécouvrir la beauté et la luxuriance de nos îles que le Seigneur nous a confiées, comme les "tarava" les chantent.

En ce mois de juillet, donnons de notre temps pour aller à la rencontre de notre prochain, pour rencontrer d'autres protestants d'autres îles, pour entrer en relation avec d'autres chrétiens, comme Jésus nous a accueillis.

En ce temps de repos, laissons le Seigneur entrer en nous pour nous vivifier, pour nous purifier afin que nous ayons de nouveau le cœur et l'esprit à rendre sa Parole vivante.

# Te tau no te faa-ea-raa

**E**ie iho te tau no te faa-ea, no te haa-māha i te rohirohi, no te rave i te òhipa aita i tiā i te rave i te tau òhiparaa, no te faaānaānatae i te manaō, no te fāreirei i te tahi e te tahi, no te fārii...

Io tātou nei, o Tiurai te āvaē no te heivāraa e no te faa-faa-ea-raa òhipa no te rahi-raa o te mau rave òhipa. Aore i maoro roa aē nei, te Tiurai te hoē òroā rahi taa ē i reira te mau mataēinaa e te mau motu ātea e tae rahi mai ai i Tahiti, i te tahua Tarahoi, no te faaite i te ruperupe e te nehenehe o te āiā fenua nā roto i te mau pūpūraa ō māa hotu e te māa tupu, te puua e te moa, nā roto atoā i te āravihī e te hoēraa o te mau pupu māiti e òri e e hīmene mai nā niā i te iōa i te mataēinaa aore ra motu i tonono mai ia rātou i mua i te aro o te mau hui mana faatere o te fenua. Te mea e haa-faafaahia, te roo ia o te mataēinaa aore ra motu ta te mau pupu e tāmata e tāpeā. I teie nei, ua rahi aē te parau no te Heiva i te Tiurai. Ua rave peu-noa-hia te tiurai. Ua pūai aē te peu i te aratairaa pupu a te hui raatira mataēinaa. Ia vaiho-noa-hia te reira hahiraa, e mou roa te faanahoraa tiurai i mātauhia. Te reira ihoā ta tātou e hinaaro ra ?

Auaē e tau faa-ea-raa òhipa teie, e taime ia to tātou no te feruri marū i te reira parau.

**Faa-ea**, i roto i teie taō, te vai ra te taō tumu **ea**. Te ea, te **ora** ia. I faa-ea-ea ai te taata òhipa, ia roaa faahou mai ia na te ea, oia hoi, te ora, no te rahi o te rohirohi i te tau òhiparaa. Na te **ānaāna-ea** e faaite mai i te rahi o te ea o te hoē taata : e ānaāna te mata, e tai oraora te reo. Ia ānaānae te tahi, e **ānaāna-tae** o ia i niā i te òhipa ta na e òpua e rave. Te ānaāna-tae, te ora ia e faautahia i niā i te hoē òhipa.

I roto i teie tau faafaa-ea-raa, ia ānaānatae tātou i te hiō faahou i te nehenehe e te heeuri o to tātou fenua mai ta te mau tārava e pehe ra, tei vai-ihohia mai e te Fatu nā tātou e haapaō ia vai mā noa ei teōteōraa na te tāatoāraa.

I teie āvaē Tiurai, ia horoā tātou i to tātou taime no te fāreirei i to tātou mau taata tupu, i te tahi atu mau porotetani no terā e terā motu, no terā e terā paroita, no terā e terā āmuiraa, no te tauāparau i te tahi atu mau teretetano. Mai ia letu i fārii mai ia tātou, noa atu to tātou huru, ia fārii atoā tātou i te mau rātere e tae roa mai i roto i to tātou mau fare pureraa, nā niā mai i to tātou mau eā aore ra nā pihai iho mai i to tātou mau fare.

I roto i teie tau faafaa-ea-raa, ia vai iho tātou i te Fatu ia tomo mai i roto ia tātou no te faa-ora faahou ia tātou, no te tāmā ia tātou i te mau viivii e rave rahi i haa-putuhia e tātou, ia roaa faahou mai te ānaānatae no te faatupu i ta na Parau Ora.

Vahi a Tuheiva-Richaud